

國立北平圖書館

著者贈

王龍著

再造論

天瑞自題




乾坤再造事千般
奮臂思回碧海瀾
非是愚公大無畏
但知其易不知難



天瑞造像

再造論圖表

著作人 王龍




再造論

王龍 天瑞

乾篇 引言(再造世界)

能掀翻世界者，乃能維護世界；能滅絕衆生者，乃能普濟衆生。煦煦似仁而非仁，子子似義而非義，私鬥不足與言勇，小慧不足以矜智。同流合污者，固不足齒；遁世鳴高者，烏能自了。咸穀亡羊，厥罪惟均。生斯世也，爲斯世也。始之以救民水火，終之以江湖相忘。天地位，萬物育，衆生同樂，物我咸享，豈非大聖、大賢、大慈、大悲、大智、大勇、大仁、之大功、大德、大勳、大業耶？天地一廬也，四海一家也，人類兄弟也。今日之人類，今日世界之主人也。試問當前之民間疾苦，以視往昔，爲增爲減？各地農村



凋敝，以視數十年前，有以異乎？社會黑暗，不減戰前，侵略新焰，何殊軸心？共匪橫行，有逾暴日。世界之完善與否？人類之安樂與否？歷代聖哲，蒿目終天，億兆忠魂，流血遍地。所爲何來？所爭何事？如其已完善，已安樂矣，則坐享其成，無勞多事。若猶未也，將忍此以終古？抑奮起而自拔？嗚呼！是可忍，孰不可忍？易經六十四卦，始「乾」而終「未濟」。孫公有言：「革命尙未成功」，吾儕亦曰：「世界必須再造」！對於尙未成功之大業，當爲更進一步之努力。遵行大道，再造世界，人人應爲，責無旁貸。象山曰：「宇宙內事，皆己分內事。」孟子曰：「當今之世，舍我其誰哉？」中外古今，聖賢豪傑人也，爾與我，亦人也，有爲者，亦若是！聞諸舊約聖經，首載上帝以六日之力，創造世界萬物，而亞

當子孫，未能盡善；上帝又捨其獨生子耶穌，以贖世人之罪。吾儕亦欲以六事再造乾坤，使臻於眞善美之域。禮云：「毋不敬，可以對越上帝。」耿耿此心，上帝有知，當無間然。六事爲何？一曰：民德（道德建設）二曰：民智，（文化建設）三曰：民強，（戰鬥建設）四曰：民本，（革命建設）五曰：民立，（兼善建設）六曰：民樂，（大同建設）完成革命，其庶幾乎。

坤篇 民德（道德建設）

法國孟德斯鳩（Montesquieu）謂：「羅馬之盛衰，由道德之隆替。」行道有得於心之謂德，德者本也。古之欲明明德於天下者，在誠、正、修、齊、治、平之大道，民德不厚，則一切典章、文物、制度、憲政、民主、革命、救國口號，皆成畫餅，甚且假寇兵而濟盜糧也。輓近以來，國際道德，社會道德，政治道德，個人道德，均成一落千丈之勢。臨難苟免，見利忘義，善惡不分，是非不明，委過邀功，妨賢害能，窮途日暮，逆施倒行。苟不急圖挽救，深恐萬劫沉淪。孟子曰：「壯者以暇日，修其孝悌忠信。」管子曰：「禮義廉恥，國之四維。」內聖外王，盡於是矣。

甲章 四修

1. 崇孝 孔子曰：「身體髮膚，受之父母，不敢毀傷，孝之始也；立身行道，揚名於後世，孝之終也。」孟子曰：「孩提之童，無不知愛其親也。」蓋孝爲百行之首，昔有倡言「非孝」，何異人頭畜鳴。禮記曰，「戰陣無勇，非孝也。」是故臨難苟免，逃避兵役，而以老親在堂，無人侍養爲口實者，可乎哉？可乎哉？

2. 敦悌 哀齊讓國，舜格象非，伊古美談。宋史載：「司馬光有兄曰伯康，年將八十，奉之若嚴父，保之如嬰兒，每食少頃，問曰：『得無飢乎？』天少冷，則拊其背曰：『衣得無薄乎？』」是爲能盡悌德而終老不衰之懿行。詩云：「伯也吹壎，仲也吹篪。」

又云：「兄弟既翕，和樂且湛。」東坡兄弟，風雨連牀之詠，尤敦友于手足之情。每見仇視同胞，而納交外人者，吾不知其何心？

3. 尚忠

馬融忠經曰：「忠者中也，至公無私。天無私，四時

行；地無私，萬物生；人無私，大亨貞。忠也者，一其心之謂也。

「大哉言乎！今夫首鼠兩端，認賊作父、二三其德，反復無常之徒，詭譎然，向人以忠貞自表，其誰欺？欺天乎！」

4. 立信

不渝之謂信，信者人言也。許氏說文，以誠信二字互

訓。孔子曰：「民無信不立。」又曰：「人而無信，不知其可也。」

「詐僞欺罔，非信也。商丘開信僞，物且無忤，况彼此皆誠乎？朋友有信，信有四端：曰共信；曰互信；曰信仰；曰信任。食言而肥，背盟毀約，自矜得計，其失彌多。」

乙章 四維

1. 循禮 孔子曰：「道之以政，齊之以刑，民免而無恥；道之以德，齊之以禮，有恥且格。」荀子曰：「禮者斷長續短，損有餘，補不足，達敬愛之文，而滋成行義之美者也。」和爲貴，毋不敬。視聽言動，莫不遵循，禮儀三百，威儀三千。交以道，接以禮，社會秩序，國家紀綱，於焉是賴。若夫卑逾尊，下凌上，禮節蕩然，禽獸奚擇？「禮樂豈爲我輩設耶？」是晉人之謬論，「不踐跡，亦不入於室。」宋儒不免誤解，亭林日知錄曰：「服堯之服，誦堯之言，行堯之行，卽踐跡也。」是爲得之。當今流俗，婚禮則不中不西，喪制則非僧非道，禮義之邦，果如是乎？

2. 重義 義者宜也；曾文正公每嘆：「求一攘利不先，赴義恐後者，而不可得。」孟子以舍生取義教人。民主國家，人民有服兵納稅之義，今則逃避兵役，偷漏捐稅者，時有所聞；毀家紓難，慷慨赴義者，幾成絕響。朱陸鵝湖之會，象山講「君子喻於義，小人喻於利。」聽者感嘆泣下。喻於義，故闇然而曰彰；喻於利，故的然而曰亡。喻於義，故坦蕩蕩；喻於利，故常戚戚。古人大義滅親，今則循情枉法。太史公亟稱游俠，非以其尚義輕生，救人緩急，有足多者耶？

3. 守廉 政治之隆替，視官吏之廉污。岳武穆言：「文官不要錢，武官不怕死，則天下治矣。」曲禮云：「臨財毋苟得，臨難苟免。」奢者富不足，儉者貧有餘。物質享受，應視不如我者，則可

儉以養廉。精神享受，應視過乎我者，則可自強不息。若徒假公濟私，巧奪豪取，窮奢極慾，使少陵所譏：「朱門酒肉臭，路有凍死骨。」之不平現象，復演於今日，則帝俄傾覆，軍閥滅亡，革命者，人將革其命矣。戒之！慎之！矜廉行酷，標廉飾僞，懲貪者貪，防盜者盜。民族前途，將如之何？

4. 明恥 孔子曰：「知恥近乎勇。」孟子曰：「恥之於人大矣，不恥不若人，何若人有？」顧亭林爲一代大儒，卽以：「博學於文，行已有恥。」自勉勉人。若夫欺世盜名，殺人越貨。獻媚如娼妓，竊食如狐鼠，賣友求榮，忍心害理，逆情干譽，立異爲高，自覺智籠羣愚，旁人代其入地。笑罵由他，心先身死，亦可悲矣！但能悚然自覺，痛革前非，則彌天罪惡，皆可化爲無量功德。孔子曰

：「惟上智與下愚不移。」陽明先生解之曰：「不是不可移，只是不肯移。」是故凡有羞惡之心，卽得遷善之路。孟子曰：「無羞惡之心非人也。」又曰：「羞惡之心，義之端也。」又曰：「如恥之，莫如爲仁，仁者如射，射者正己而後發，發而不中，不願勝己者，反求諸己而已矣。」先哲以衆生未度爲恥，以一夫不被其澤爲恥，以國仇未報爲恥，以尸位素餐爲恥，以德業不修爲恥，以枉道干人爲恥。簞瓢陋巷，疏食飲水，衣敝緼袍、抱關擊柝，居之泰然，未以爲恥。孔子曰：「士志於道，而恥惡衣惡食者，未足與議也。」今則不恥先哲之所恥，而恥先哲之所不恥。紀綱崩潰，人慾橫流，奇恥大辱，相逼而至，無恥之徒，熙來攘往，人之所以異於禽獸者幾希，以市井人觀市井人，彼此不覺耳。

震篇 民智(文化建設)

歐戰告終，人心厭亂，詛咒軍國主義，而倡文化主義 (Kultur-ismus) 文化謂個人與社會之合理發展，文化主義，即人類生活之圓滿滿鵠的也。

孔子曰：「智者不惑。」民主政治，乃以國家為人民之公器，與眾共治，非竊為私產，焚坑愚民，而行家天下之故智也。世界列邦，學術文化，突飛猛進，我若抱殘守缺，故步自封，而求等量齊觀，平等共進，豈不謬哉？某巨公子，留學海外，每試輒冠其曹，行將卒業，往應口試，答非所問，語無倫次，不知所云，主試愕然，微探其故，乃知平日凡應筆試，皆隨從秘書，某某博士專為捉刀

人也。今日教育之病態，在公教人員與平民之子弟，雖有英才，無力就學，淪爲荒廢。貪污富豪諸紈袴子，雖不堪造就者，亦必利用賤款，竊取學位，足遍五洲，胸無點墨。文化低落，文盲普遍。不學無術，攘利爭權；以己昏昏，使人昏昏。一爲文人，已無足觀；文人相輕，尤堪鄙棄。始則有新舊之爭，而舊學則漢宋分張；新學則科玄論戰。此亦一是非，彼亦一是非。知其一而不知其二者也。今且束書不觀，惟利是圖，殆每况而愈下矣。坊肆流行刊物，類皆怪力亂神，鴛鴦蝴蝶，出版道德，民族正氣，蕩然無餘，勝利以還，益形顯著，苟欲轉識成智，端賴溫故知新。

甲章 溫故

1. 義理 孔子集往聖之大成，孟軻經世，荀卿傳經，儒門龍象，異軌同奔。程朱主敬，陸王主靜。敬則主一無適，靜則寂然不動。始乃自強不息，終乃至誠無息。內聖外王，止於至善。門戶雖殊，其至一也。躬行則實，口耳則虛。經濟出於義理，文章首重立誠。小儒亂真，心傳垂絕。習齋怒谷，實踐可風。

2. 經世 莊子曰：「春秋經世，先王之志。」孟子曰：「孔子作春秋，而亂臣賊子懼。」周之末季，百家爭鳴，儒、墨、名、法、道德、陰陽、各欲以其術易天下。而旨趣有醇有疵，惟儒家爲得其正，大學格、致、誠、正、修、齊、治、平、之道，彌綸天地之間，皆以修身爲本，博大精深，政治哲學，并世無儔，泰西論政，瞠乎後矣。

3. 攷據 秦火以還，書缺有間，兩京老宿，爲事殷勤。西漢主微言大義，東漢主名物訓詁。文字孳乳，必探厥源，形則說文略備，聲則廣韻述之，義則爾雅究焉。治國故者，道源小學，與西方學人，習拉丁文，大抵相類，典章制度，鑑往知來，欲爲文章，必先識字，諸子百家，可證經史。牽強附會，無取焉耳。

4. 詞章 孔子曰：「言以足志，文以足言，言之不文，行之不遠。」言志載道，用異本同。文章與世推移，豪傑乘機競逐。古詩不拘對仗，杜甫以排律見工，律尙謹嚴，杜甫以拘體破格，乾坤兩位，獨制文言。古文體兼駢散，韓愈去偶存奇。水滸紅樓，不廢方言，胡適齊之以京白，故謂杜爲詩聖，韓爲文豪，胡爲白話之功臣也可；謂詩亡於杜甫，文亡於韓愈，白話亡於胡適，亦無不可。後

之學者，必能頂天立地，揆古酌今，爲三子之所不爲，而後乃有長留天地之詩文也。

乙章 知新

1. 科學 歐洲科學，遠源希臘，其樹立現代科學宏基者，爲文藝復興時期，幾許以身殉學之士。科學家爲求真而努力，科學因實用而發達。因尼羅河流域之農業，而養成古代埃及人之天文學。希臘學者，又因埃及測地技能，而發明幾何學，科學之發明，既日新而月異。如原子能放射性電子論等，又須有最新之科學素養，及數學基礎，始能了然。籠統、迷信、淺薄、守舊、皆中國科學不發達之主因，允宜精研慎用，造福蒼生，國防科學，尤爲要圖！外國軍

事，久以科學致勝爲務。中國過去仍以壯烈犧牲爲榮。外國用火藥製彈禦敵，中國過去用爲燃爆敬神。外國用南針航行，中國過去用羅盤看風水。外國用鴉片製藥，中國過去用之吸食過癮。莊子曰：「能不龜手一也，或以封，或不免於泮，辨統，則所用之異也。」

2. 哲學 希臘七賢，古稱哲匠。杜威羅素，輓近大師，狄奧根 (Diogenes) 白晝持燈，正人難覓。柏拉圖 (Plato) 烏托對話，妙境成虛。寄深情於翰墨，却濁世之妖氛，同斯心理，無間西東。哲學爲言，義訓「愛智」。格物致知，下學上達。西方學者，謂爲求最高統一知識。初興於人之好奇心，因自然界形形色色，千態萬狀。而驚異，而懷疑，而研討，斯成哲學。爲宇宙論，爲本體論，爲認識論，一元，二元，唯物，唯心，義雖各執，理有殊勝。世界哲學

可分三派：一曰印度，重人與神之關係，其生活態度爲「超脫」。二曰西洋，重人與物之關係，其生活態度爲「着實」。三曰中國，重人與人之關係，其生活態度爲「敬慎」。融會貫通，是待來哲。不明邏輯，而高談哲學者妄也！

3. 文學 歐洲文藝復興以後，「古典主義」盛行，十八世紀末葉，「浪漫主義」起而代之。「寫實主義」興於十九世紀初期，重客觀，輕主觀，與「浪漫主義」相背馳，復有「新浪漫主義」(New Romanticism)出，與現實不即不離，能兼「浪漫主義」與「寫實主義」之長，略近晚明文學。古希臘荷馬(Homer)之史詩，意大利但丁(Dante)之神曲，英國彌爾登(Milton)敘事詩，德國歌德(Goethe)浮士德，與屈宋名篇，杜韓傑作，炳煥東西，并爲瓊

寶。

4. 藝術 西方藝術，導源希臘羅馬，代有發明，如音樂、建築、雕刻、繪畫、諸端，亦俱猛進。如法國巴黎高塔，拔地九百八十四尺，德國拉烏氏 (Ravch) 之康德塑像，英國維爾基 (Wilkie) 之史跡名畫，德國曼特爾斯登 (Mendelsso. Den) 夏夜之夢等名曲，駸駸與東方雲池，韶舞，長城，阿房，龍門，雲崗，武梁、燉煌抗衡，振大漢之天聲，發思古之幽情，美意延年，他山攻玉，正有俟乎繼今以往也。

巽篇 民強(戰鬥建設)

佛言：「夫爲道者，譬如一人，與萬人戰。挂鎧出門，意或怯弱。或半路而退，或格鬥而死，或得勝而還。沙門學道，應當堅持其心，精進勇銳，不畏前境，破滅罪魔，而得道果。」國家之興衰，視乎人民之強弱。西諺云：「健康之精神，寓於健康之身體。」以黃帝的子孫，承漢唐之故業。民有東亞病夫之譏，國有次殖民地之勢。曠觀四海，上溯列宗，不肖子孫，懷慚無地。嗚呼！惜哉！是何故耶？何以振之？有勇知方。莊子曰：「其嗜欲深者，其天機淺。」佛云：「無罣礙故，無有恐怖。」

甲章 有勇

易曰：「天行健，君子以自強不息。」孔子曰：「以不教民戰，是謂棄之。」國人以早婚，晏起，沉湎酒色，痼疾煙霞，竹林之遊，俾晝作夜。病疾則求仙問卜，醫藥則秘製神方。營養不適，災疫流傳。男子則白面書酸，女子則冶容病態。拘瘠憔悴，瘦弱短小，富貴以逸樂戕身，貧賤以積勞致疾。意志頹唐，形容衰朽。寂然待斃，弱不禁風，不生不死，非鬼非人。求其任重致遠，發憤圖強，思想健全，建樹宏遠，執干戈，衛社稷，興滅國，繼絕世。一怒而天下懼，一呼而萬衆起者，何可得耶？故必尚體育，重軍訓，研醫藥，講衛生，去除習染，革面洗心。養成堅強勇猛之軀，以當風雨雷霆之際。耐勞耐苦，允武允文。不避艱險，視死如歸，堂堂之陣，正正之旗，推倒一世之智勇，開拓萬古之心胸，泱泱大國之風

，固當如是也。孟子曰：「富貴不能淫，貧賤不能移，威武不能屈，此之謂大丈夫。」如墨翟救宋，田單攻燕，馬援平交趾，班超征西域，關羽忠漢，岳飛破金，天祥舉義於福州，陽明擒濠於南昌，戚繼光之征倭，史可法之拒虜，華盛頓之興美，惠靈吞之敗法，霞飛結束歐戰，凱末爾重光祖國。皆炳煊史冊，凜凜如生。

1. 有組織 有組織，有力量，烏合之衆，雖多亦奚以爲？

2. 有訓練 訓練重於作戰，以不教民戰，是爲棄之。

3. 有紀律 盜且有道，國軍無紀，不如其已。

4. 有技術 新武器，新戰術，武器相同，技優者勝。

5. 有策劃 運籌帷幄，決勝千里，孫子曰：「不戰而屈人之兵，善之善者也。」軸心之敗，非兵不利，無籌算也。政略失策，戰

略成空。

6. 有利器 科學戰鬥，遠射程，擴威力，元子放射，所向無敵。

能如是，可謂有勇矣。

乙章 知方

古之兵家有言：「國雖大，好戰必亡，天下雖安，忘戰必危。」

「怯於公戰，勇於私爭，鼓血氣之勇，為萁豆之煎者，斯乃小人，何足言勇。近世西方學者，鑒於世界大戰，伏屍億萬，流血遍野，詛咒戰爭，以為毀滅文明者有之。歌頌戰爭，以為促進文明者亦有之。戰爭究為善為不善耶？吾人以為戰爭之本體，無善無惡，戰爭

之鵠的，有善有惡。卽正義之戰爲善，則可歌可頌。侵略之戰爲惡，則可咒可恨。故強國必先強種，而種強者國未必強，豈特不必強，甚且懼殃。有勇而不知方，其害不可量。德日逞暴，自取滅亡。殷鑒不遠，永誌勿忘！

如是我聞，重瞳項羽，秦失其政，陳涉首難，豪傑蠱起，相與并爭，不可勝數。羽無寸土，起隴中，三年滅秦。分裂天下，而對王侯，咤叱風雲，古未嘗有。及閉關懷楚，放逐義帝，而興叛亂，自矜功伐，欲以力征。經營五年，卒亡其國，身死東城，尙不自覺，美人駿馬，遺恨無窮，曰天亡我，非戰之罪，豈其然耶？拿破崙氏，百戰雄師，所向無敵，恢復北意，加冕稱帝，十九世紀，破俄普軍，英西奧葡，環而攻之，偏師一出，四國不支，親率大軍，

六十萬衆，東向征俄，俄兵敗績，莫斯科危，堅壁清野，施火攻計，乘機追殺，大敗法軍，退至巴黎，僅千餘卒，英奧諸國，聯軍禦之，遂陷巴黎，匪復不成，卒被幽囚，聖受倫島，着書歿世。是二人者，東西怪傑，以不知方，徒供憑弔，况其英勇不如項羽拿破崙者乎？

1. 救危亡 興滅國，繼絕世，治亂持危。

2. 伸正義 春秋無義戰，仁者無敵。

3. 誅暴亂 亂臣賊子，人人得而誅之。

4. 爲人羣 弔民伐罪，登諸衽席。

5. 固疆圉 與國土共存亡，棄甲，曳兵，與轉移陣地，截然兩

事，不可混同。

6. 平天下 不嗜殺人者能之一。人心厭亂思治，如大旱之望雲霓，飢者易爲食，渴者易爲飲。若夫以暴易暴，則將載舟覆車矣。國家主義，昧於偏狹之私，不明世界大勢。帝國主義，有侵略野心，而自取滅亡。世界主義，無民族基礎。不能實現。共產主義，亂天下有餘，平天下不足。大學之道，禮運之篇，持平如水，天下歸仁。

能如是者，可謂知方。

坎篇 民本（革命建設）

書曰：「民爲邦本，本固邦寧。」近世民本主義（Democracy）遠源希臘，主張構成國家之分子，均爲獨立自由之人民。應有參與團體意思之構成權利。人人皆有參與政治之機會。蓋自十七世紀英國民權建設，實爲自由主義與民主主義典型國家之肇端，至一七七六年美國獨立，一八三〇年法國大革命，莫非受此時代精神之感應。故民主主義之高潮，瀰漫大地，爲近百年來建國之典型，及世界政治轉變之一大關鍵，若其捨自由平等而冒民主之名者，是南轅而北轍矣。政黨政治，民主美談，和衷共濟，視民如傷，若夫專政獨裁，固違民主，賣身投靠，朋比分贓者，非也。通謀外國，稱兵作

亂者，尤非也。

甲章 自由

曷謂自由？要義有二：一曰：不受壓迫，二曰：率性而行。外界之束縛，可流血衝決，內心之束縛，非大勇莫解。民主政治，認爲人皆自由獨立，無先天服從他人之義務，國由民建，服從國家之意思，實卽服從自己之意思也。美國獨立，法國革命，其宣言中，於人民自由，均有強調主張。西洋近代史中，政治之更張，軍事之戰鬥，其時不同，其國不同，莫非以爭取「自由」之口號，爲其原動力也。自由固以無礙他人爲範疇，尤以載之憲章爲切要。後來諸立憲國家，莫不詳列人民之自由，例如：

1. 身體自由 非依法律，不得逮捕，監禁，審問，處罰，以匿名誣陷，而妄與莫須有之獄以爲敲詐者，非文明國。一二一五年英國大憲章，已有提審規定，迄今仍有妄事羅織，濫押無辜之國家。

2. 財產自由 私有財產制既未廢除，法律即應保護。不得隨意查封沒收，妨害權利，法國人權宣言中已標列之。

3. 居住自由 比利時憲法第十條亦有「住宅不受侵犯，搜索必依法律」之規定。往者軍閥擾民，旅邸盤查，軍警森嚴，終日無間，終夜不休，而殺人越貨之事，層出不窮。偵諜密佈，情報頻繁，而內亂外患之萌，一概無聞。

4. 言論自由 偶語棄市，焚書坑儒之暴政，已爲萬世所唾罵。

英國現行法於無傷他人之言論，均可暢所欲言。惟無行文人。牙牙

學語，往往以妬嫉之心情，爲流言之誹謗。中國刑法及出版法，已有禁條，當知所戒。至於公正言論，自不宜過分箝制，有傷民主風格。

5. 信仰自由 西洋史中有以宗教信仰而興長期戰爭者，中國無國教，故無所爭。惟上焉者主無神之論，下焉者膜拜馬牛龜蛇，其愚不可及也。

6. 講學自由 古代希臘哲人蘇格拉底（Socrates）倡導正學而遇害，孔子畏於匡人，前清黃巖教案，皆妨害講學自由之例也。

7. 集會結社自由 人民有集會結社之自由，比利時憲法第二十二條，瑞士憲法第五十六條，及中國憲法，均有規定。

8. 通訊秘密自由 往時僅曰：書信，今則通訊方法甚多，故不

專指書信，漫無限制之郵電檢查，與竊聽私人談話，同一無禮貌，不自重。

9. 免受恐怖自由 大軍之後，必有凶年，佳兵不祥，聖人不得已而用之。羅斯福曰：「國內無安全，世界無和平。」外患內亂，皆足影響國人精神健康。

10. 免除匱乏自由 失業者流離凍餓，借貸無門，任職者力竭精疲，不得溫飽，織者無衣，耕者無食，教員子弟，無力就學，汚吏奸商，不勞而食。是誰之過歟？以上二項自由，為美國羅斯福及華萊士二氏之所力倡。

人民自由，各國憲章，或詳或略，轉相列載，不知今日之寥寥數行文字，皆往昔仁人志士，前仆後繼，死生不渝，灑碧血而寫成

者也。後之民賊，視爲具文，一面於憲法規定人民之自由，惟恐不詳，一面用命令侵奪人民之自由，惟恐不盡。一乘一除，人權蕩然。是老子所謂：「將欲取之，必故與之。」之別解耶？袁世凱曹錕民國之罪人也，然皆曾頒布憲法，其憲法中亦皆有人民自由之規定，憲法云乎哉？自由云乎哉？是故有假自由而行之罪惡，亦有因亂命而奪之自由。文王厄於羑里，孔子畏於匡人。孫公倫敦蒙難，蔣公西安蒙難，甘地幽囚絕食，羅素言論犯禁。偉人自由受制，舉世譁然聲援。其實放眼看去，自由被侵，窮民無告，忍痛含愁，死不瞑目者，古今冤獄，正不知其凡幾，而無是非，無骨氣，以耳代目，麻木不仁，趨炎附勢之言論，又從而落井下石也。吾不知長夜漫漫，何時達旦？

乙章 平等

英儒安樂德 (Mathew Arnold) 之言曰：「因不平等，而上流殉於物質，中流趨於庸俗，下流淪為殘暴。」又云：「平等為感化人生之正道，居平等社會，使人精神向上，能力發展。」因人類社會之不平等，乃有平等之要求。以視佛家之「平等」。莊子之「齊物」。雖精粗有別，亦殊塗同歸。韓退之云：「凡物不得平則鳴。」不平之氣，鬱於人心，必以宣洩而後快。始於思想，中為行動，終成事實。法律之修訂，政治之革新，宗教之改良，奴隸之解放，階級之衝突，莫不皆然，故近代革命史，亦即爭取平等理想，而犧牲流血之記載也。平等原則，應由國內而國際而全人類，所應共享。

1. 教育平等 無論富貴貧賤之子女，應一律免費受同等教育。有志讀書，無力納費，為極普遍之慘痛。

2. 種族平等 無論國內國際各種民族，不可歧視欺侮，亦不必諂媚足恭。

3. 男女平等 男子不可視女子為奴隸，女子亦不可以男子作馬牛。

4. 義務平等 納稅服兵，人民必盡義務，但土豪劣紳，既可多方避免，忠厚農民，每受分外之苦。

5. 政治平等 普遍選舉參政，權能仍應區分，賄選，獨裁，兩俱可鄙。

6. 法律平等 王子犯法，與庶民同罪，法律非欺壓平民之工具

，刑不上大夫之陋習，不容存於現代。

7. 經濟平等 經濟不平等，為社會革命之主因，故遺產制度及私有財產制，應否存在？亟應商討。

8. 宗教平等 信教自由，不容有入主出奴之私見。

9. 道德平等 人類應互敬相愛。臣罪當誅，天王聖明。僚屬敬禮，長官傲慢。前方苦戰，後方跳舞。小兵拚命，大將怕死。男可冶遊，女必守貞。此皆違背道德平等之怪現象，習非成是，以為當然。

10 社會平等 人與人，國與國，皆為平等，互相敬愛，既不必妄自尊大，如蠻夷長；亦不必妄自菲薄，如奴隸附庸。

離篇 民立(兼善建設)

盤盤大地，芸芸衆生。種族分張，習俗歧異。由簡之煩，煩復化簡。自茹毛飲血，爭雄掠奪，以進文明；因文明復鬥爭殘殺。人之生也，固若是其芒乎？造化於人，固若是其弄乎？十九世紀英人達爾文(Darwin)倡進化之論。厥後俄人克魯泡特金(Kropotkin)復主互助之說。言各有當，然皆就一般生物演進之跡，以論人類社會也。孔子曰：「人之所以異於禽獸者幾希。」詩云：「天生蒸民，有物有則，民之秉彝，好是懿德。」是則就人論人，以視達爾文克魯泡特金二氏，何止略勝一籌。近世國家主義，近乎是矣，而流爲凌弱暴寡之黷武野心，世界主義，近乎是矣，而流爲大而無當之難

成空想，或爲勤遠略者之侵奪口實。是二主義，胥無當焉。民立有二義：曰自立，曰立人。

甲章 自立

大同固所嚮往，小康亦豈可忽，特爲之也。

1. 國界 須劃分清楚，一寸河山一寸血。不可因租借獨立之名，而忍割讓之辱。

2. 國防 須確實建立，以目還目，以牙還牙。不抵抗，非國策。

3. 立法 注意社會福利，顧全實施情形。以免閉門造車，出門不能合轍。

4. 司法 減程序，廢死刑，行陪審，縮審限。賠冤獄，罪疑惟輕，應有執法如山，持平如水，守身如玉，疾惡如仇，獨立不倚之風格。「歷歷如繪，自堪認定」之武斷陳套，有背真實發現主義，否則水滸紅樓，未嘗不歷歷如繪，豈亦自堪認定乎？「如得其情，則哀矜而勿喜。」何況階下囚未必無冤，堂上人未必無罪也。

5. 行政 重效率，去僚氣，懲貪墨，視民如傷。提高待遇，減少程序。警政關係國家治安及社會福利甚大。

6. 監察 大處着眼，不畏權勢，蠅自應捕，虎亦毋縱。

7. 考試 拔取真才，品學兼重，不但干祿者必有所試，在位者於考核外亦必逐年考試，以定升黜。

8. 經濟 昔者法儒孟德斯鳩倡立法、司法、行政，三權分立之

說，中山先生增入考試、監察，遂爲五權之創論。孫公心理、社會、政治、經濟、四項建設，蔣公益以倫理，遂爲五項建設。竊以中國金融紊亂，財政枯竭，百業衰落，一籌莫展，皆由經濟制度，內外牽制，未能確立。以視社會主義之計劃經濟，與法西斯之統制經濟，咸有遜色；而民生主義之經濟理論，亦未盡實施。戰後雖有經濟部之設立，猶嫌不足以當重任。鄙意於憲法中當增設「經濟院」與其他五院并立，擴爲六權憲法。則建國大業，或可早觀厥成，羣衆心理，不至過分失望，管窺愚見，願共商討。

9. 外交 不偏，不屈，不媚，不欺，不視外使如天使。

10 軍事 徵兵須用三平原則，舞弊者罰，執干戈，衛社稷，戡亂建國，有勇無前；他如黨派之私，闖牆之鬥，毀文明，竭府庫，

孰爲戎首？人民公敵。軍令如山，紀律似鐵，勿壞風紀，爲軍人羞。

11 財務 發展國民經濟，剷除官僚資本。黃金自宜國有，抑價須防外流。乞靈印機，理財下策。稅捐收入，須慎用途，量民力。

12 教育 每保至少二小學，每縣至少二中學，每省至少二大學，全國至少五所研究院。減少科目，減少假期，減少年限，注重人格教育，養成智、仁、勇、三達德。嚴懲借學斂財之教痞！自小學至大學，學膳書籍文具制服等費全免。服務後漸次抽還。利用無線電及電影普及教育，惟中國電影，幼稚簡陋者可憐，外國電影，誨淫誨盜者可惡。無線電專播靡靡之音，令人浩歎。

13 交通 發展海陸空交通網，普及低廉，疏濬江河，開闢道路

；內地至今仍有渾然太古，不識舟車之縣民，宜速救之。勝利還都，舟車阻塞，有流落異鄉數年不能成行之義民。

14 衛生 行公醫制，全免醫藥費，取締不知醫藥之庸醫，審查統治萬病之妙藥，嚴懲毒殺胎兒之術士。清潔檢查，須看背街小巷

15 農鑛 開荒開鑛，田屬農有，鑛爲國營，利用科學方法，備置最新機器。改良種子，增加出產。中國農具，渾然古拙，頗似神農遺物。

16 工商 發展輕重工業，獎勵海外貿易。勿以苛捐，橫加摧殘。中國生產落後，勞動時間，應暫加爲九小時，工資亦應比照增加。

17 市政 都市農村化，農村都市化，將密不通風之市容，留隙地，植花木，增生氣，將自然發展之農村，改爲有計劃有條理之市容。以現代國家之首都，而城內無公園，豈非憾事！民族須有藝術生活，乃有革命精神也。

18 婦女 希望婦運同志，在高呼男女平等，女子參政，職業婦女，諸口號外，不可遺忘買婢，賣淫，溺嬰，打胎，童媳，指腹爲婚，買賣嫁娶，種種病態，是否依然存在？奇裝異服，是否美觀與衛生？

19 護僑 僑胞冒風險，旅域外，遭歧視，謀發展，對國家早有重大貢獻，國家對僑民，應有相當愛護。

20 保健 改善營養，實行優生，注重體育，禁止早婚，節制烟

酒。

乙章 立人

均是人也，同立大地，同爲圓顛方趾，而苦樂不同。或施壓迫，而作福作威，吸髓敲骨。或受壓迫，而如水益深，如火益熱。是豈造化之心哉？孔子曰：「己欲立而立人，己欲達而達人。」堯典曰：「百姓昭明，協和萬邦。」「大同」之旨，固不自禮運始也。

第二次世界大戰，是民主國家反法西斯之爭，其意義視第一次世界大戰尤爲重大，故同盟國於反侵略戰爭中，共尋世界永久和平之途徑。威爾遜於第一次世界大戰後，巴黎和會，創設國際聯盟，第二次世界大戰中，各愛好和平之民族，因國聯失敗而遭受一切苦

厄，益知戰後健全之國際組織，爲不可或缺。故羅斯福曰：「吾人之重大任務有二：一爲戰勝，一爲組織全球性之國際機構，以防止新戰爭之發生。」故於一九四一年大西洋憲章後，繼之以莫斯科中美英蘇四國宣言，及一九四四之頓巴敦橡樹會議，而終有一九五五年之聯合國憲章，惜乎！羅斯福齋志以歿，不及親見之也。

聯合國憲章之序文曰：「我聯合國人民同茲決心，欲免後世再遭今代人類兩度身歷慘不堪言之戰禍，重伸基本人權，人格尊嚴與價值，以及男女與大小各界平等權利之信念，創造適當環境，俾克維持正義，尊重由條約與國際法及其他淵源而起之義務，久而弗懈，促成大自由中之社會進步及較善之民生，并爲達此目的，力行容忍，彼此以善鄰之道，和睦相處，集中力量，以維持國際和平及安

全。運用國際機構，以促成全球人民經濟及社會之進展。用是發憤立志，務當同心協力，以竟厥功。……今日聯合國會員果能同心協力乎？是應反省者也。

再
造
語

聯合國憲章之宗旨：一、維持國際和平及安全，并爲此目的採取有效集體辦法，以防止且消除對於和平之威脅，制止侵略行爲或其他和平之破壞；并依和平方法且依正義及國際法之原則，調整或解決足以破壞之國際爭端或情勢。二、發展國際間以尊重人民平等權利及自決原則爲根據之友好關係，并採取其他適當辦法，以增強普通和平。三、促成國際合作，以解決國際間屬於經濟、社會、文化、及人類福利性質之國際問題，且不分種族、性別、語言、或宗教，增進并激勵對於全體人類之人權及基本自由之尊重。四、構成

一協調各國行動之中心，以達成上述共同目的。

憲章一百一十一條，譯為諸國文字，煌煌巨觀，用心良苦，自不容忽視其價值。但細加推究，豈能無疵，如第七章第三十條至五十一條「侵略行爲」「和平威脅」「地方事件」「破壞和平」諸用語，無嚴格之界說，難為確解，易生流弊，此其一。否決權之享有者，為聯合國安全理事會中常務理事，而小國不與也，易為侵略者所利用，而無法防止，此其二。警衛力量，有名無實，能否戡亂扶危？尚難預測，此其三。各會員不能誠意力行憲章，則聯合國名存實亡，此其四。是為理論上之研討也。至如一二野心國家背約橫行，肆無憚忌。越南，埃及，緬甸，朝鮮，巴勒斯坦，菲律賓，諸殖民問題，甚囂塵上。共產國際，再度出現。中國大戰之後，繼以

內亂，民窮財盡，將爲第三次大戰之導火線。正義支持，經濟援助，俱所急需。以上諸問題，聯合國憲章中之安全理事會，將何以處理？憲章第九章所謂經濟合作，將如何兌現？皆爲當前之事實問題。如不能圓滿解決，則聯合國將爲柏拉圖之烏托邦，而蹈國際聯盟之覆轍矣。故民德不修，則凌弱暴寡，違約背盟。民智不啓，則是非顛倒，文化落後，民強不樹，則如羅斯福所言：「無維持和平之意志與力量，則無和平可言。」民立 in 自立立人，民本求自由平等，民樂在胞與爲懷，六者相連，如環之無端。吾儕於立人之願望如次：

1. 自決 世界各弱小民族自決。

2. 無差別 種族顏色，雖不盡同，智識能力，無差別相。

重。

3. 解放 被壓迫民族及國家，一律解放。
4. 澈底 有解放之名而仍蒙壓迫之實各民族，一律澈底解放。
5. 消亂萌 消滅以侵略為事之國家及民族之亂萌。
6. 宏法治 擴大法治精神，消滅國際間無政府狀態之暴行。
7. 遵主權 大國與小國之主權，同為立國之要素，應同等尊重。
8. 互助 一國逞兵，羣起而攻之。
9. 守界 嚴守國界，無為公敵。
10. 融通 經濟合作，文化交流。

良篇 民樂（大同建設）

人生爲苦爲樂？生命爲短爲長？宇宙社會與人生關係若何？東西哲人，各抒妙論，見智見仁，莫衷一是。大智度論云：「衆生常畏苦，而常行苦，如盲人求好道，反墮深坑。」佛言：「苦、集、滅、道、是爲四諦。彌綸世間，有八種苦：一曰生苦，二曰老苦，三曰病苦，四曰死苦，五曰愛別離苦，六曰怨憎會苦，七曰所求不得苦，八曰五陰熾盛苦。」十九世紀德國哲人叔本華（Schopenhauer）以爲「人爲生之意志所驅，盲目前進，得不償失，失望無聊，生種種苦。」莊子曰：「人之生也，與憂俱生。」詩云：「人生不滿百，常懷千載憂。」是以人生爲苦者矣。古代希臘哲人伊壁鳩魯

(Epicurus) 則以爲：「人生應避苦而就樂，樂爲至善，苦卽罪惡。

「古詩云：『人生行樂耳，須富貴何時？』孔子蔬食飲水，樂在其中。顏子簞瓢陋巷，不改其樂。是以人生爲樂者也。」「先天下之憂而憂，後天下之樂而樂。」「須知陋巷窮中樂，又識莘耕樂處憂。

「是憂樂係乎衆生者矣。孟子曰：『禹思天下有溺者，由己溺之也。稷思天下有飢者，由己飢之也』維摩詰經曰：『衆生病，故我病，衆生不病，我亦不病。』孟子曰：『養其小體爲小人，養其大體爲大人。』張子曰：『民吾同胞，物吾與也。』故小我與大我，個人與社會，生命與宇宙，渾然一體，休戚相關，無可分割。衆生安樂，我亦安樂。宇宙永在，我亦永在。陶潛曰：『世與我而相遠。』李白詩云：『君平旣棄世，世亦棄君平。』文人抒感，言各有

謂，詎能執着？惟既生天地之間，與空氣、社會、政治、三者習習相依，而欲相遺相棄，勢所不能。是故消極逃避厭惡，不如積極努力前進。或與天地并生，或與艸木同腐，在人善自抉擇耳。莊子曰：「哀莫大於心死。」老子曰：「死而不朽者壽。」要令人間世，化爲眞善美，同心，同進，同作，同享，民胞物與，世界大同。

甲章 民胞

1. 「大道之行也」 道，猶路也；康成朱子，俱同此解。夫道若大路然，坦蕩平夷之光明大道，非崎嶇偏狹之黑暗小道也。中國古代學術，史記分爲六家，漢書析爲九流，惟儒家得其正。近世哲學論著，社會思想，政治學說，黨派組織，紛然雜陳，亦有善有不

善，政治有路線，行爲有軌範，歧途之中，復有歧焉。未入迷途者，慎之於始，已入迷途者，回頭是岸。

2. 「天下爲公」 說文云：「自營曰私，背私爲公。」但知有己，不知有人。假公濟私，亂由是起。詩云：「雨我公田，遂及我私。」顧亭林曰「合天下之私，以成天下之公。」先公後私，公而忘私。天下爲公，私亦在其中矣，天下爲私，私亦不自保矣。孔子曰：「不患貧，而患不均。」井田之制，均貧富也。地權平均，則經濟平等。集體農場，殆近似之。井田古制，雖不必復，井田之意，均衡極則也。

3. 「選賢與能」 選政民主也。毋放棄：毋褻瀆；選以賄成，固不足道。選以勢成，亦甚可鄙。賢者品優，能者才卓。不才而在

高位，是播其惡於衆也。如果競選之人，不自檢點，傾軋卑鄙，醜態百出，人格掃地，有如曹錕，化身億萬，選舉訴訟，互相醜詆。吾不知其當選以後，爲公爲私？選政前途，爲得爲失？杜魯門之妻喟然歎曰：「有子不爲總統，有女不嫁總統。」嗚呼？有不爲之意，而爲之者，乃可以有爲。以視雞蟲之爭，患得患失，無所不至者，其賢不肖爲何如耶？

4. 「講信修睦」 無信，則爾詐我虞，不睦，則相爭相鬥，人生慘劇，社會糾紛，國際問題，政治風波，民刑訴訟，均由是起，其始也簡，其終也巨。

5. 「故人不獨親其親」 老者安之，老吾老，以及人之老，爾有母貽，絜我獨無。四海之內，皆兄弟也。

6. 「不獨子其子」 少者懷之，幼吾幼，以及人之幼。是亦人子也，宜善遇之。

7. 「使老有所終」 養生送死而無憾，王道之始也。養老制度未立，少壯清勤供職，衰老無所依歸，貪污之風，所自來歟？敬老會，養老院，普遍設立。

8. 「壯有所用」 不患末己知，患其不能也。人盡其才，無待鑽營奔競，亦免學非所用，用非所學，自誤誤人之荒謬。

9. 「幼有所長」 適當教養，人格學問，健全發展，蒙以養正，聖功也。普設育幼院，幼稚園，小學校。

10. 「矜寡孤獨廢疾者，皆有所養。」 窮民無告，公養公醫，勇士不忘喪其元，爲國流血之戰士，尤應優奉。

11 「男有分」 各盡天職，思不出位。以勞易食，心蹟雙清。

12 「女有歸」 合法婚姻，合理職業，公娼私妓，民族之差。婚姻係於人生幸福甚大，如孔雀東南飛，釵頭鳳及詩人勃朗寧之立像與胸像諸故事，皆最大悲劇。大同境界，內無怨女，外無曠夫。

乙章 物與

1. 「貨惡其棄於地也，不必藏於己」 重農、開鑛、裕商、惠工。發展輕重工業，地盡其利，物盡其用，爲人類社會謀福利，非爲一身一家謀奪取也。

2. 「力惡其不出諸身也，不必爲己」 人人爲我，我爲人人，羣策羣力，而不自私自利。

3. 「是故謀閉而不興，盜竊亂賊而不作」 慾高物寡，供不應

求，故巧奪而豪取，生穿窬之心，有殺人越貨之事，各盡其能，各取所需。倉廩實而知禮節，衣食足而知榮辱。飢寒交迫，則挺而走險；家給人足，則安享太平。孔穎達曰：「今天下一心，故圖謀之事，閉塞而不起，有乏必與，竊盜焉施？有能必位，亂賊何作？」

4. 「故外戶而不閉」 路不拾遺，夜不閉戶，天下一家，何分畛域？

5. 「是謂大同」 衆人熙熙，如登春臺。錦衣，盛饌，精舍，華軒，妙樂，美育，七寶莊嚴，萬花飛舞，惟意所需，各如其量，清風明月，不費一文。車同軌，書同文，行同倫。四海之內；皆兄弟也，萬物皆備於我矣，自其異者視之，肝膽楚越也，自其同者視

之，萬物皆一也。天地與我並生，萬物與我爲一，無人我相，與天地參。

人類因語言相通，則情愫易融，固矣。然不得謂殊方異語，卽有礙大同也。民族形成，山川險阻，方言差異，驟難強同，湘南嘉禾一縣境內，有數種互不相同之土白，而縣人團結甚堅。世界語之倡導，收效未宏。中國語用之者爲四萬萬人；英國語用之者爲二萬萬人，俄語及西班牙語各爲一萬萬人，故中國語習之者衆，英語流行者廣，此其大較也。近代侵略中國者，爲同文之日本，歷年內亂者，爲同語之國人。而共同戰敗軸心，奠定和平基石者，爲中、美、英、等不同語言之國家。故曰：語言互通，則感情愈洽，語言差異，亦無礙大同。大同之道，在彼不在此也。赤子無言，而林回棄

千金之璧，負赤子而趨，是其驗也。

春秋公羊學張三世之說：曰、據亂。曰、升平。曰、太平。「太平」即「大同」也。據亂世，則衆生樂少苦多。昇平世，則衆生有苦有樂。太平世，則衆生共登極樂，境現華嚴矣。孔門言性有三義：據亂世，人性惡，荀卿述之。昇平世，善惡混，楊雄言之。太平世，人性善，孟子傳之。莊周受學於田子方；於大同妙境，能獨證而未能共往，是故通性理之精微，弘大同之奧旨者，孔子以後，孟子一人而已。泰山巖巖，浩然正氣，道不遠人，士惟尙志。

康南海先生曰：「吾年二十七，當光緒甲申法兵震羊城，吾避兵居西樵山北，銀塘鄉之七檜園澹如樓，感國難，哀民生，著大同書，以爲待之百年。不意卅五載，而國際聯盟成，親見大同之行也。」

。嗚呼！此先生垂暮之年，望治之殷，姑如是云云，實則不但昔之國聯，不足言大同。即今之聯合國，皆「昇平」與「小康」耳，以視無人我，無國界之「大同」，仍一間未達而有涇渭之別也。大同必現無疑，成功不必自我。今日共同前進之人，即異時共享大同之人也。佛言：「若勤精進，則事無難者。是故汝等，當勤精進，譬如小水長流，則能穿石。」

兌篇 結論(易知易行)

孔子曰：「知仁勇三者，天下之達德也。」道德建設，即仁者不憂也。文化建設，即智者不惑也。戰鬥建設，即勇者不懼也。春秋張三世，革命建設，據亂世也。兼善建設，升平世也。大同建設，太平世也。本書立論之旨，蓋欲約哲學，政治，宗教三者之義而一之，應乎人生與社會之需求。皆平實而易簡，詞取明切，雅俗共喻。與三民主義，相輔而成。與時偕行，尤有進焉。所願有志之士，無論男女、老幼、貧富、貴賤、聞風興起，篤信力行。以悲天憫人之懷，為繼往開來之業。以免世界大戰，層見疊出，含生之倫，災害并至。化悲慘世界，為淨土天堂。區區之心，不勝大願，愚公

之愚，智叟之智，各行其是，未可強同。伊尹告太甲曰：「知之非艱，行之維艱。」陽明主良知，約之以：「知行合一」。孫公倡導革命，歷陳十事，以證「知難行易」。胡適歸自美洲，倡實用主義，既駁諸子出於王官之論，復爲「知難行亦不易」之說。昔者亞里斯多德 (Aristotle) 言「愛真理重於愛吾師。」吾儕於諸君子之論，咸表敬佩，而管窺所及，願進一解，曰：「知易行亦易。」非標新立異，自矜創獲，證之典籍，推之殊方，蓋亦有說。周易曰：「乾以易知，坤以簡能。易則易知，簡則易從。易知則有親，易從則有功。有親則可久，有功則可大，可久則賢人之德，可大則賢人之業。易簡而天下之理得矣，天下之理得，而成位乎其中矣！」老子曰：「吾言甚易知，甚易行，天下莫能知，莫能行。」王弼註曰

：「惑於躁欲，故曰莫之能知也，迷於榮利，故曰莫之能行也。」
孔子曰：「仁遠乎哉？我欲仁，斯仁至矣。」佛說無量壽經：「至心精進求道不止，會當剋果，何願不遂。」拿破崙曰：「我之字典中，無難字。」尋繹旨趣，均無不合。是知路無遠近，行之則遠者亦近，不行則近者亦遠矣。事無巨細，爲則難者亦易，不爲則易者亦難矣。故在黑暗世界中，不顧一切，大聲疾呼曰：再造世界！易知易行。不知不行者，自暴自棄也。張橫渠曰：「爲天地立心，爲生民立命，爲往聖繼絕學，爲萬世開太平。」其斯之謂歟！

宇宙變化，人事代謝，冥冥之中，孰爲之宰，孰推移之？歷史中心，究爲何物？三界惟心，萬法惟識，大地山河，皆成虛幻，不生不滅，不來不去，非名非相，應無所著，而生其心。佛家主之，

三藏浩博，自固疆圍。唯心之義，此其至者。故華嚴經偈云：「若人欲了知，三世一切佛，應觀法界性，一切唯心造。」馬克斯沿黑智爾之說，而倡唯物史觀，抒一偏之見，階級鬥爭，倒果爲因，是社會之病態，非社會之生理也。中山先生，以民生史觀，正其錯誤，後來居上，允爲政治經濟學上之定論，賢於馬克斯遠矣。惟依哲理推之，進化中心，又爲何物耶？達爾文之進化論煊赫一時，而人之與猿，既難強同，互助之義，重於競爭。達爾文說，未盡信也。易曰：「形而上者謂之道，形而下者謂之器。」孔子曰：「人之所以異於禽獸者幾希」馬克斯知有器而不知有道，達爾文知有獸而不知有人。毫厘千里，不亦宜乎？易曰：「立天之道，曰陰與陽。立地之道，曰柔與剛。立人之道，曰仁與義。」周濂溪釋之曰：

「乾道成男，坤道成女，二氣交感，化生萬物。萬物生之而變化無窮焉。」則「道」爲宇宙進化之大原歟？禮運篇云：「大道之行也，天下爲公。」「公」乃進化之正常軌範也。大學篇云：「大學之道，在明明德，在新民，在止於至善。」「明德」成己也，「新民」成物也。「止於至善」乾乾不息也。中庸篇云：「天地之道，可一言而盡也，其爲物不二，則其生物不測。」不生者，能生生，不化者，能化化也。書云：「人心爲危，道心惟微，惟精惟一，允執厥中。」此哲學史中心法十六字，天人合一之道也。孔子曰：「君子憂道不憂貧。」爲上智說法也。孟子曰：「不患貧而患不均。」爲衆生說法也。古今中外，殺身成仁，舍生取義者，皆重內輕外，重義輕利，而造成光榮史蹟也。中庸篇又云：「道也者，不可須臾

離，可離非道也。」夫道即公理，即衆心，即潮流，即進化之中心也，違之，失之，反之，逆之，皆足爲禍，成敗興衰，如嚮斯應。歷覽史跡，鑒往知來。順天者昌，逆天者亡，進化中心，大道之行也。以上所述，就儒家哲學，以明其真確顯著，了無疑義。

復次，求旁證於道家；老子曰：「有物混成，先天地生，寂兮寥兮，獨立不改，周行而不殆，吾不知其名，字之曰道，強爲之名曰大。」又曰：「道生一，一生二，二生三，三生萬物。」又曰：「人法地，地法天，天法道，道法自然。」舍大道之行，無進化可言矣。

復次，求旁證於法家；韓非子曰：「道者萬理之所稽，理者成物之文，道者萬物之所以成。」大道爲進化中心也。

復次，求旁證於佛家：佛云「因滅故果滅，滅苦之道，即是真道。」亦可強解爲歷史進化之因果律歟？佛云：「行道守眞者善，志與道合者大。」亦可強作「英雄造時勢，時勢造英雄。」之解歟？

復次，求旁證於基督教：約翰福音云：「太初有道，道與上帝同在，……萬物是藉着他造的。」探源荒古，有史以前，天人合一，道在斯乎。

復次，求旁證於回教：古蘭經法諦海章「主導余輩以正道，是道也，受主眷者由之，非觸主怒者背道而馳也。」何莫由斯道也。

復次，旁證於西洋現代哲學權威之新實在論 New Realism 羅素有言：「宇宙根本，中立原子 Neutral Particulars 既非心理，亦非

物理，心物之別，兩俱不存。雖爲同因，未必同果，當倡創造，而抑佔有。革故鼎新，爲而不有。」羅素之書，頗崇老子，蓋有取乎「可道非道，可名非名。及無名天地之始，有名萬物之母」之玄旨，故知進化之道，而時有精言，惜乎未聞禮運大同之道也。

歸而證之儒家：易曰：「天地革，而四時成。湯武革命，順乎天而應乎人。」孟子曰：「得道者多助，失道者寡助，寡助之至，親戚畔之。多助之至，天下順之，以天下之所順，攻親戚之所叛，故君子有不戰，戰必勝矣。」又曰：「道在邇，而求諸遠，事在易，而求諸難，人人親其親，長其長而天下平。」故曰，再造世界，完成革命。進化中心，大道之行。大道之行，易知易行。不知不行者，自暴自棄也。

再造社社章 (草案)

一、本社確信革命尙未成功，世界必須再造，民德（道德建設）民智（文化建設）民強（戰鬥建設）民本（革命建設）民立（兼善建設）民樂（大同建設）六者，爲再造之要道。

二、以全世界，全人類，全社會，爲再造對象。不以一地域，一國度，爲終極。以虛偽罪惡醜劣爲仇敵，以真善美爲依歸。

三、本社爲超黨派志士之大團結，凡贊成本社主旨，有誠心毅力共修勝業者，不分國籍，性別，黨派，宗教，職業，凡年滿二十歲，品行端正，由社友二人負責介紹，填寫入社申請表，經總社考核認可後，得登錄爲本社社友，發給證書證章。

社會賢達，各界聞人，贊同本社主旨者，得爲特約社友，辦法另訂之。

四、本社社友，以進德修業，覺民濟世爲務，不做政治工具，不作奸犯科，獨立平等，互相策勉。以志同道合相團結，故相稱謂曰「同道」個人言行，自負其責，品德不

端，隨時除名。

五、本社組織如次：

(甲)總揆一人，綜攬一切社務。對大會決議有交付複議之權，對任檢事會決議有最後決定權。

(乙)總社設任事三十五人，候補任事十五人，常務任事十五人，檢事十五人，候補檢事七人，常務檢事七人。

(丙)各省特別市及海外分社設正副主幹各一人，任事十五人，候補任事七人，常務任事七人，候補檢事五人，常務檢事五人。

(丁)各縣及普通市支社設正副主幹各一人，任事九人，候補任事五人，常務任事五人，候補檢事三人，常務檢事三人。

(戊)社友每十人為一組，互推一人為組長，為本社基本單位。合二組以上為聯組，按區域方位，分為東西南北中及四郊，但分社所在地不得超過九聯組，支社所在地不得超過五聯組為原則。各組長為聯組當然幹事，並設正副總幹事。

六、總社暫設於中國首都，分組訓部，文書部，宣導部，福利部，救助部，外事部，編審部，經理部，各部設正副主任各一人，均由任檢事分別兼任，專員若干人，就社友選任，分社設處，文社設科，兼任如總社。分支社社址，以設於省縣制所在地為原則。

七、本社會期如次：

(甲)全國社友代表大會，每二年舉行一次。

(乙)總社任檢事全體會議，半年一次，常務任檢事會，每月一次，均由總撥主持之。

(丙)分社社友大會，每年一次，任檢事全體會議，每二月一次，常務任檢事會，每月一次。

(丁)支社社友大會，半年一次，任檢事全體會議，每月一次，常務任檢事會，半月一次。

(戊)十人組每半月開會一次，聯組每月開會一次，報告社務推進，讀書心得，時事

述評，身心修養。

八、總社及分支社，得設文化，設計，經濟，研究，婦女，農民，工商，生產，公教，學生，等委員會。各社友按學歷，職業，興趣，分別系屬。每會設委員二十一人，常委五人，候補五人，輪流主持。常委會每月開會一次，委員會二月一次，大會半年一次。

九、社費全年十二萬元，普通一次付，學生兩次付，樂捐聽便。

十、本社章知有未盡事宜，得依全國社友大會五分之一提議，過半數通過，修訂之。（

附入社申請書樣本）

再造社入社申請書

年 月 日 字第	最近二寸半身 脫帽照片二張 背面自書姓名	通訊處 現在	現職 與歷	學歷	姓名	謹以至誠，遵章入社。救人救世，不遷不忘。 黃
	介紹人 1. 2. 入社號碼 <input type="checkbox"/> 字第 <input type="checkbox"/> 字第 審查人意見 <input type="checkbox"/>	永久	別號 簽字蓋章 性別 年齡 籍			

社 友 守 則



不避艱苦

不隨流俗

不畏強暴

不欺弱小

不爲無益

不失其時

不逾禮法

不附權勢

不愧於天

不作於人

再造十頌

王龍

光明欲滅	熱情垂絕	沉沉世態	冷酷陰黑	再造乾坤	三光位列	融融春陽	朗朗秋月
大道甚夷	荆棘塞之	大道甚邇	虎狼距之	披荆斬棘	撲滅虎狼	手揮利劍	示彼周行
鏗寡孤獨	不可侮也	凶暴奸邪	不足怖也	救民水火	不容緩也	剛健中正	不能轉也
深耕乃獲	力行乃成	固窮奚辱	俸進奚榮	水流花放	石破天驚	萬化反復	守之以誠
以牙還牙	以目還目	以殺止殺	以德報德	己立立人	己達達人	春風風人	夏雨雨人
春日麗兮	衆卉爭芳	秋霜降兮	萬木彫傷	四序代謝	榮悴靡常	蒼松古塔	卓立蒼茫
慈母之愛	赤子之心	推己及人	先其所親	擴而充之	四海歸仁	疎而失之	不保其身
阿爾卑士	高而可陟	直布羅陀	深而可涉	日月逝矣	安可復得	猛志未遑	耿耿終夕
羣星煜煜	大宙寂寂	一塵不驚	萬念俱息	不知有我	安知有物	與天地參	渾然無蹟
遵行大道	斯躋大同	絕航斷港	罔不途窮	至人無己	神人無功	開來繼往	重關鴻蒙

春興八首次秋興韵

三十四年與趙炎武鍾伯毅舒禮鑑諸君子於湖南藍山南平詩社舊作

王龍

醒藉春光識故林 蕭疎喬木漸森森 冲霄片羽將奚適 蔽日浮雲未解陰 莽莽神州

橫劍氣 芸芸芻狗詎天心 往時轟飲歌呼地 萬戶丘墟罷杵砧

天缺西南斗柄斜 女媧勤補費韶華 時艱思蓄三年艾 歸夢驚呼萬里槎 好典敝裘

供把酒 未消殘虜况聞笳 忍看一片沙場血 幻作郊原無限花

殘冰無計禦晴暉 豁目羣峯意渺微 負未共欣時雨足 遠柯乍見乳鴉飛 敢隨列子

乘風去 却羨君平與世違 賴有寸田未荒廢 太和呼吸道能肥

且勞國手振枯棋 不作新亭兒女悲 正朔千秋仍在漢 少康一旅足匡時 橫歌冲檄

情如熾 蕩寇歸耕計未遲 世亂親朋各星散 春風無地寄相思

踏遍湘南山外山 吟筇仍滯葛山間 鄂王妙墨出師表 陸子狂歌大散關 新燕未能

忘舊宇 綠醪儻可駐朱顏 他年銘勒燕然石 嘗有雄文擬馬班

阿堵傳神願虎頭 英雄兒女各千秋 業隆漢祚思光武 湖傍都門憶莫愁 燕市幾人

求駿骨 海濱有客狎沙鷗 永州咫尺遶江海 八記何堪憶柳州

萬象森羅造化功 大千渺渺一漚中 意識能射石爲虎 心動非關幡與風 春水漸成

嘗戶綠 桃花不是去年紅 談空說有嫌多事 相喻無言迦葉翁

遙岑挂眼故遮遮 溶漾微瀾動綠波 雪散李桃有驕色 風狂烏鴉少安枝 湘南渾似

江南好 塔影空隨日影移 昨夜鐘山入我夢 護陵新柳萬絲垂

王龍律師講學賣文鬻書

不負西南萬里行。凱歌聲裏復神京。四方奔走丘何爲。大事因緣佛有情。

且著文章撐宇宙。好循法度致澄清。陰霾慘霧須除盡。共睹青天白日明。

學者覺也，以先覺後。學者效也，取法乎上。仲尼有言：「學之不講，是吾憂也」

。中土私家講學之風，肇於洙泗。與天竺釋迦牟尼，希臘蘇格拉底，鼎峙輝映。立教以明人倫，不學則近禽獸。道衰世降，弗絕如縷。開來繼往，其將誰待？夫書，舒也

。澹胸拓境。心畫爲書，心正筆正。六藝之目，以書爲美，我國獨爾，並世無儔。東施效顰，曷足齒數。吾家右軍，古今書聖。龍臨池卅載，塗鴉無成。未紹家風，有慚往哲

。 「文言」爲辭，見諸周易。言之無文，行之不遠。風行水上則成文，文者載道之器也。歐洲中古，漫漫長夜。文藝復興，(Renaissance) 乃呈曙色。坵壇俊彥，殊軌同奔，相如賈賦，古已有之。昌黎諷墓，亦無取焉。孟氏曰：「入則無法家拂士，出則無敵國外患者，國恆亡。」八年抗戰，旣因敵國外患，而殷憂啓聖，復興民族矣。今後建國，則法家拂士，所宜任重致遠者也。律師爲業，但能蓄道德，能文章，精研法理，辨才無礙，則維護民權，主持正義。片言折獄，不平則鳴。超然塵表，南面王不易也！近世美國林肯威爾遜之倫，乃捨律師而爲總統，豈不怪哉！抑有不得已而爲之者耶！

〔賈文例〕碑志傳狀壽序，每篇三千萬元，頌贊詩歌，每篇一千萬元。有豐功偉烈高節懿行於人類社會者，或不泥值。人品文體不合者，倍值不應。

〔鬻書例〕對聯，五尺壹百萬元。每加一尺加二十萬元。中堂同聯，屏條折半。牌匾，貳百萬元，每字二方尺四字為度，逾度增值。篆分直行，四體同值。紙張自備，來文點景迫促雖宣值均不應。


〔講學例〕科目文學，法學，哲學，書學。聽講者須大學或專科畢業或同等學力，皆可應大學講座之聘。天瑞學院在籌備中。

〔律務例〕辦理首都地院高院最高法院民刑訴訟，及非訟事件行政訴訟。以主持正義，救助平民為原則。赤貧而蒙奇冤者，不收公費。無論貧富，小冤抑，宜忍受，毋與訟，訟不勝訟。世界大同，乃無可訟。

〔接談時間〕，中午十二時至二時，下午五至六時。業務忙碌，著作待理，時間經濟，談話從簡。

事務所 南京夫子廟新姚家巷二十九號之一
電話 二二四三九轉

中華日報
二月 四日 九日 出版



王龍著心遠廬叢書

出版預告

國父遺教精義(中宣部獎金)增訂四版

地方自治通論(蘇區訓所教本)再版

法理學(譯本)校訂中

訴訟須知再版

天瑞詩草最近付印

天瑞文存增訂中

天瑞學術講論集繕校中

四書一貫繕校中

不許翻印

中華民國三十六年十一月初版

再造論一冊

定價國幣叁萬元

著作人 王龍

發行人 再造社籌備處

印刷者 華豐印刷鑄字所

南京洪武路二三五號

經售處 全國各大書店

南京太平路萃文書局 太平書店

問經堂書店 慶福書店

中央商場內大地書店

夫子廟問經堂書店 泮池書社

外埠向南京夫子廟新姚家巷二十九號之

一王龍律師事務所函購者免致寄費

#10
10/002

